



ԵԴ1/0188/15/23

ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ

ՎՃՌԱԲԵԿ ԴԱՏԱՐԱՆ

Ո Ր Ո Շ ՈՒ Մ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՆՈՒՆԻՑ

Երևան քաղաքի առաջին ատյանի
ընդհանուր իրավասության քրեական դատարան,
նախագահող դատավոր՝ Վ.Մարգարյան

Հայաստանի Հանրապետության
վերաքննիչ քրեական դատարան,
նախագահող դատավոր՝ Ա.Բեկթաշյան

9 հոկտեմբերի 2025 թվական

ք.Երևան

ՀՀ Վճռաբեկ դատարանի քրեական պալատը (այսուհետ՝ Վճռաբեկ դատարան),

նախագահությամբ՝
մասնակցությամբ դատավորներ՝

Հ.ԱՍԱՏՐՅԱՆԻ
Ս.ԱՎԵՏԻՍՅԱՆԻ
Հ.ԳՐԻԳՈՐՅԱՆԻ
Ա.ԴԱՆԻԵԼՅԱՆԻ
Լ.ԹԱԴԵՎՈՍՅԱՆԻ
Ա.ՊՈՂՈՍՅԱՆԻ

գրավոր ընթացակարգով քննության առնելով ՀՀ վերաքննիչ քրեական դատարանի՝
2023 թվականի հուլիսի 24-ի որոշման դեմ մեղադրյալ Անդրանիկ Նվերի Ավագյանի
պաշտպան Ռ.Հակոբյանի հատուկ վերանայման վճռաբեկ բողոքը,

Պ Ա Ր Զ Ե Ց

Վարույթի դատավարական նախապատմությունը.

1. 2022 թվականի հունիսի 19-ին, Արագածոտնի մարզային քննչական վարչությունում, 2003 թվականի ապրիլի 18-ին ընդունված ՀՀ քրեական օրենսգրքի (այսուհետ՝ նաև ՀՀ նախկին քրեական օրենսգիրք) 104-րդ հոդվածի 2-րդ մասի 6-րդ կետով և 235-րդ հոդվածի 1-ին մասով հարուցվել է թիվ 24101222 քրեական գործը:

2022 թվականի նոյեմբերի 3-ին Անդրանիկ Նվերի Հակոբյանի նկատմամբ հանրային քրեական հետապնդում է հարուցվել ՀՀ նախկին քրեական օրենսգրքի 104-րդ հոդվածի 2-րդ մասի 1-ին, 6-րդ և 7-րդ կետերով (2021 թվականի մայիսի 5-ին ընդունված ՀՀ քրեական օրենսգրքի 155-րդ հոդվածի 2-րդ մասի 7-րդ և 8-րդ կետեր, երեք դրվագ):

2022 թվականի նոյեմբերի 3-ին նախաքննության մարմինը որոշում է կայացրել ազատության մեջ գտնվող մեղադրյալ Ա.Ավագյանի նկատմամբ կալանավորումը որպես խափանման միջոց ընտրելու նպատակով նրան դատարան ներկայացնելու համար ձերբակալելու մասին:

2022 թվականի նոյեմբերի 4-ին նախաքննության մարմինը հանձնարարել է մեղադրյալ Ա.Ավագյանին հայտնաբերելու նպատակով նրա նկատմամբ հետախուզում հայտարարել և կազմել հետախուզական գործ, ձեռնարկել համապատասխան օպերատիվ-հետախուզական միջոցառումներ մեղադրյալ Ա.Ավագյանին հայտնաբերելու և քննությանը ներկայացնելու ուղղությամբ:

2022 թվականի նոյեմբերի 5-ին Երևան քաղաքի առաջին ատյանի ընդհանուր իրավասության դատարանի կողմից բավարարվել է մեղադրյալ Ա.Ավագյանի նկատմամբ կալանքը որպես խափանման միջոց կիրառելու վերաբերյալ նախաքննության մարմնի միջնորդությունը:

2023 թվականի հունվարի 20-ին հսկող դատախազը բավարարել է վարույթն իրականացնող մարմնի միջնորդությունը և որոշում է կայացրել կասեցնել մեղադրյալ Ա.Ավագյանի քրեական հետապնդման ժամկետը՝ վերջինիս կողմից քննությունից խուսափելու հիմքով:

2023 թվականի ապրիլի 28-ին որոշում է կայացվել մեղադրյալ Ա.Ավագյանի վերաբերյալ մասով թիվ 24101222 քրեական վարույթից նոր՝ թիվ 69111723 վարույթն անջատելու մասին:

2023 թվականի մայիսի 24-ին ՀՀ ներքին գործերի նախարարության ոստիկանության Մաշտոցի բաժնի աշխատակիցների կողմից հայտնաբերվել և ձերբակալվել է հետախուզվող մեղադրյալ Ա.Ավագյանը:

2023 թվականի մայիսի 24-ին հսկող դատախազը բավարարել է վարույթն իրականացնող մարմնի միջնորդությունը և որոշում կայացրել մեղադրյալ Ա.Ավագյանի նկատմամբ հարուցված հանրային քրեական հետապնդման ժամկետը վերսկսելու մասին:

2023 թվականի մայիսի 24-ին Ա.Ավագյանին ներկայացվել է մեղադրանքը:

Նախաքննության մարմնի՝ 2023 թվականի հունիսի 15-ի գույքն արգելադրելու մասին որոշմամբ, վարութային ծախսերն ապահովելու նպատակով, 2.668.000 ՀՀ դրամի չափով արգելադրվել է մեղադրյալ Ա.Ավագյանի անվամբ սեփականության իրավունքով գրանցված՝ ***** փողոցի № **** հասցեում (№ *****_**-**** վկայական) գտնվող անշարժ գույքը (*.***** հա հողամասը և ***.** քմ ընդհանուր մակերեսով շենք-շինությունը):

Նախաքննության մարմնի միջնորդության հիման վրա Երևան քաղաքի առաջին ատյանի ընդհանուր իրավասության քրեական դատարանը (այսուհետ՝ նաև Առաջին ատյանի դատարան) 2023 թվականի հունիսի 17-ին հարուցել է սեփականության իրավունքի սահմանափակման իրավաչափության դատական ստուգման վարույթ և որոշել այն իրականացնել գրավոր ընթացակարգով:

Առաջին ատյանի դատարանի՝ 2023 թվականի հունիսի 23-ի որոշմամբ գրավոր ընթացակարգով իրականացվող վարույթը փոխակերպվել է բանավոր ընթացակարգով վարույթի:

2. Առաջին ատյանի դատարանի՝ 2023 թվականի հունիսի 29-ի որոշմամբ նախաքննության մարմնի միջնորդությունը բավարարվել է և հաստատվել է վարույթն իրականացնող մարմնի՝ գույքն արգելադրելու վերաբերյալ 2023 թվականի հունիսի 15-ի որոշման իրավաչափությունը:

3. Մեղադրյալ Ա.Ավագյանի պաշտպան Ռ.Հակոբյանի հատուկ վերանայման բողոքի քննության արդյունքում, ՀՀ վերաքննիչ քրեական դատարանը (այսուհետ՝ նաև Վերաքննիչ դատարան) 2023 թվականի հուլիսի 24-ի որոշմամբ բողոքը մերժել է և անփոփոխ թողել Առաջին ատյանի դատարանի՝ 2023 թվականի հունիսի 29-ի որոշումը:

4. Վերաքննիչ դատարանի վերոնշյալ որոշման դեմ մեղադրյալ Ա.Ավագյանի պաշտպան Ռ.Հակոբյանը ներկայացրել է հատուկ վերանայման վճռաբեկ բողոք, որը Վճռաբեկ դատարանի՝ 2023 թվականի սեպտեմբերի 29-ի որոշմամբ ընդունվել է վարույթ, և սահմանվել է վճռաբեկ բողոքի քննության գրավոր ընթացակարգ:

Վճռաբեկ բողոքի հիմքերը, փաստարկները և պահանջը.

Վճռաբեկ բողոքը քննվում է հետևյալ հիմքի սահմաններում՝ ներքոհիշյալ փաստարկներով.

5. Բողոքաբերի պնդմամբ՝ ստորադաս դատարանների կողմից թույլ են տրվել քրեադատավարական օրենքի խախտումներ, որոնք իրենց բնույթով էական են, քանի որ ազդել են վարույթով ճիշտ որոշում կայացնելու վրա, և արգելադրված անշարժ գույքի սեփականատեր, մեղադրյալ Անդրանիկ Ավագյանի և նույն գույքի նկատմամբ գույքային շահ ունեցող անձ Օ.Մ.-ի համար առաջացրել են մի շարք անհամաչափ և երկարատև սահմանափակումներ՝ կապված իրենց սեփականության տնօրինման, տիրապետման և օգտագործման սահմանադրական իրավունքի հետ:

5.1. Բողոքի հեղինակը նշել է, որ սեփականության իրավունքի սահմանափակման իրավաչափության ստուգման վարույթի հարուցումը մերժելու օրենսդրությամբ սահմանված իմպերատիվ հիմքերի առկայության դեպքում կայացվել է վարույթ հարուցելու մասին որոշում: Մասնավորապես, վարույթի մասնավոր մասնակիցները և արգելադրված գույքի նկատմամբ գույքային շահ ունեցող անձ՝ մեղադրյալի մայր, գույքի տիրապետող Օ.Մ.-ն, տեղյակ չեն եղել, որ քննիչը կայացրել է Առաջին ատյանի դատարան է ներկայացրել գույքի արգելադրման մասին որոշման իրավաչափությունը հաստատելու վերաբերյալ միջնորդություն, քանի որ սույն միջնորդության պատճենը ՀՀ քրեական

դատավարության օրենսգրքի 295-րդ հոդվածի 3-րդ մասի հիման վրա, չի տրամադրվել:

5.2. Բողոք բերած անձը նաև նշել է, որ քննիչը էլեկտրոնային եղանակով ուղարկել է իր միջնորդությանը կից դատարան ներկայացրած 66 կետերից բաղկացած բազմաձևավալ նյութերի միայն ցուցակը (ցանկը), իսկ նյութերը չի տրամադրել: Այդ նյութերը չեն տրամադրվել նաև սեփականության իրավունքի սահմանափակման իրավաչափության ստուգման դատական նիստին (նիստից առաջ կամ նիստի ընթացքում), ինչպես նաև դրանք չեն հետազոտվել դատախազների ընթացքում:

Վերոգրյալի հիման վրա, բողոքաբերը եկել է հետևության, որ վարույթի հանրային մասնակցի հետ դիրքորոշում հայտնելու հավասար պայմաններում չի գտնվել:

5.3. Ըստ բողոքի հեղինակի՝ անշարժ գույքն արգելադրելու իրավական նպատակ(ներ)ի և հիմք(եր)ի առկայությունը պատճառաբանված և հիմնավորված չէ: Մասնավորապես, տվյալ քրեական վարույթի ընթացքում բոլոր վարութային ծախսերի հանրագումարից նվազագույնը մոտ 11 անգամ ավել արժեքի անշարժ գույքի, որի արժեքը որոշվել է ոչ թե շուկայական արժեքով, այլ դրան մոտարկված կադաստրային արժեքով՝ մեղադրյալ Անդրանիկ Ավագյանին պատկանող տան և հողամասի արգելադրմամբ խախտվել են տվյալ դատավարական հարկադրանքի միջոցի կիրառումը կանոնակարգող նորմերի և Վճռաբեկ դատարանի՝ տվյալ իրավական հարցին վերաբերող նախադեպային որոշումների պահանջները:

Բողոք բերած անձը նշել է, որ որպես գույքի արգելադրման հիմք վկայակոչվել է միայն ողջամիտ ենթադրությունը, որ Ա.Ավագյանը կարող է օտարել անշարժ գույքը, և առկա չէ որևէ փաստական հանգամանք, որը հիմնավորում է այդ ենթադրությունը:

Բողոքաբերը նշել է, որ արգելադրված գույքի նկատմամբ գույքային շահ ունեցող անձ՝ մեղադրյալի մայր, գույքի տիրապետող Օ.Մ.-ն քննիչին առաջարկել է արգելադրել այլ գույք, օրինակ՝ տեխնիկա, կահույք և այլն, սակայն քննիչը, առանց որևէ հիմնավորման, անտեսել է օրենսդրությամբ սահմանված այդ առաջարկը:

Բողոքի հեղինակը, վկայակոչելով այն հանգամանքը, որ քննիչը դատական նիստում հայտարարել է, որ Անդրանիկ Ավագյանի անվամբ սեփականության

իրավունքով հաշվառված են երկու տրանսպորտային միջոցներ՝ արտասահմանյան արտադրության ավտոմեքենաներ, նշել է, որ վարույթի մասնավոր մասնակիցների համար անհասկանալի է, թե ինչու արգելադրում չի կիրառվել դրանցից մեկի նկատմամբ:

Բողոքաբերը նաև նշել է, որ թեև արգելադրումն անշարժ գույքի նկատմամբ դրված է կոնկրետ չափով, սակայն անշարժ գույքը չի կարող լիարժեքորեն տնօրինվել՝ տրամադրվել վարձակալության, վաճառվել, գրավադրվել և այլն:

5.4. Վերոշարադրյալի հիման վրա, բողոքաբերը եկել է եզրահանգման, որ ստորադաս դատարանները, չպատճառաբանված դատական ակտ կայացնելով, թույլ են տվել «Մարդու իրավունքների և հիմնարար ազատությունների պաշտպանության մասին» եվրոպական կոնվենցիայով, ՀՀ Սահմանադրությամբ և ՀՀ քրեական դատավարության օրենսգրքով երաշխավորված արդար դատական քննության իրավունքի խախտում:

6. Ելնելով վերոգրյալից՝ բողոքաբերը խնդրել է բեկանել ՀՀ վերաքննիչ քրեական դատարանի՝ 2023 թվականի հուլիսի 24-ի որոշումը և կայացնել դրան փոխարինող դատական ակտ:

Վճռաբեկ բողոքի քննության համար էական նշանակություն ունեցող փաստական հանգամանքները.

7. Նախաքննության մարմնի կողմից 2023 թվականի հունիսի 23-ին էլեկտրոնային փոստի միջոցով Ա.Ավագյանի պաշտպան Ռ.Հակոբյանին է ուղարկվել գույքն արգելադրելու մասին որոշման իրավաչափությունը հաստատելու վերաբերյալ միջնորդության և դատարան ներկայացված նյութերի ցանկի սկանավորված տարբերակը¹:

8. Առաջին ատյանի դատարանը 2023 թվականի հունիսի 29-ի որոշմամբ արձանագրել է հետևյալը. «(...) Ուսումնասիրելով միջնորդությունը, ներկայացված քրեական վարույթի նյութերը, Դատարանն արձանագրում է, որ սույն դեպքով առկա է նախաձեռնված քրեական վարույթ, Անդրանիկ Նվերի Ավագյանին վերագրվում է 2003թ. ապրիլի 18-ին ընդունված ՀՀ քրեական օրենսգրքի 104-րդ հոդվածի 2-րդ

¹ Տե՛ս վարույթի նյութեր, հատոր 2, թերթեր 33:

մասի 1-ին, 6-րդ և 7-րդ կետերով (գործող ՀՀ քրեական օրենսգրքի 155-րդ հոդվածի 2-րդ մասի 7-րդ և 8-րդ կետեր /երեք դրվագ/) նախատեսված ենթադրյալ հանցագործության կատարում: Նշված վարույթի շրջանակներում կատարված նախաքննության ընթացքում բավարար փաստական տվյալներ են ձեռք բերվել այն մասին, որ վարութային ծախսերը կազմում է 2.668.000 ՀՀ դրամ: Նման պայմաններում, դատարանի գնահատմամբ հիմնավոր է քննիչի միջնորդությունը՝ վարութային ծախսերի հատուցումն ապահովելու համար Անդրանիկ Նվերի Ավագյանի (ծնված 27.02.1990թ., ՀԾՀ *****) անվամբ սեփականության իրավունքով պարկանող **** քաղաքի **** փողոցի № **** հասցեում «№ ****-**-**** վկայական» գրնվող անշարժ գույքը «*.***** հա հողամասի և ***.** քմ ընդհանուր մակերեսով շենք-շինության» արգելադրելու մասին, նաև հիմնավոր է քննիչի ենթադրությունն առ այն, որ մեղադրյալ Անդրանիկ Նվերի Ավագյանի կողմից իրեն պարկանող գույքը կարող է օտարվել (...):

Ինչ վերաբերում է պաշտպանի այն դիտարկմանը, որ իրեն ի սկզբանե չի տրամադրվել միջնորդության օրինակը՝ հերևաբար այդ հիմքով ևս միջնորդությունը ենթակա է մերժման, ապա Դատարանը արձանագրում է, որ դա ըստ էության սույն փուլում կրում է ձևական բնույթ՝ հաշվի առնելով, որ մինչև սույն միջնորդության բանավոր ընթացակարգով ըստ էության քննարկումը Քննիչի կողմից պաշտպանին տրամադրվել է միջնորդության օրինակը, ապահովվել է պաշտպանի իրավունքը ներկայացնելու համապատասխան առարկություններ, հերևաբար պաշտպանական կողմի որևէ իրավունք այդ առումով չի խախտվել:

Բացի այդ Դատարանը հարկ է համարում նշել, 14.06.2023թ-ին ՀՀ կադաստրի կոմիտեից ստացված № ԱՊ/7985-2023 գրության համաձայն Կադաստրի կոմիտեի էլեկտրոնային արխիվի տվյալների համաձայն Անդրանիկ Նվերի Ավագյանի անվամբ սեփականության իրավունքով գրանցված, քաղաք ****, **** փողոց № **** հասցեում գրնվող անշարժ գույքի շուկայական արժեքին մոտարկված կադաստրային արժեքը, համաձայն 2019 թվականի նոյեմբերի 19-ի «Անշարժ գույքի հարկով հարկման նպատակով անշարժ գույքի շուկայական արժեքին մոտարկված կադաստրային գնահատման կարգը սահմանելու մասին» ՀՕ-225-Ն ՀՀ օրենքի 4-րդ հոդվածով սահմանված գնահատման կարգի, կազմում է 28,345,859 ՀՀ դրամ:

Այսինքն, Դատարանը գտնում է, որ նշված անշարժ գույքի շուկայական արժեքը ակնհայտորեն չի կարող գերազանցել վարույթային ծախսերի չափը, ուստի նման իրադրությունում քրեադատավարական այդ դրույթի չապահովումը չի կարող հանգեցնել քննիչի որոշման ոչ իրավաչափության: Վերոգրյալի արդյունքում Դատարանն արձանագրում է, որ քննիչ Գ.Մոյսյանի թիվ 69111723 քրեական վարույթով գույքի արգելադրման որոշման իրավաչափությունը հաստատելու մասին 16.06.2023 թվականի միջնորդությունը հիմնավոր է, ուստի այն պետք է բավարարել և հաստատել 2023 թվականի հունիսի 15-ի՝ «Գույքն արգելադրելու վերաբերյալ» որոշման իրավաչափությունը (...):²:

9. Վերաքննիչ դատարանը 2023 թվականի հուլիսի 24-ի որոշմամբ արձանագրել է հետևյալը. «(...) Վերաքննիչ դատարանը, Առաջին աստիճանի դատարանի որոշման վերը նշված հիմնավորումները դիտարկելով վերոգրյալ իրավական նորմերի լույսի ներքո, գտնում է, որ այդ հիմնավորումներն ամբողջությամբ բխում են դրանցից, որպիսի պայմաններում այդ հիմնավորումներն ընդունելի են նաև Վերաքննիչ դատարանի համար:

Վերաքննիչ դատարանն իր անհամաձայնությունն է արտահայտում վերաքննիչ բողոքում նշված փաստարկներին և փաստում է, որ սույն դեպքով առկա է նախաձեռնված քրեական վարույթ, Անդրանիկ Նվերի Ավագյանին վերագրվում է 2003 թ. ապրիլի 18-ին ընդունված ՀՀ քրեական օրենսգրքի 104-րդ հոդվածի 2-րդ մասի 1-ին, 6-րդ և 7-րդ կետերով (գործող ՀՀ քրեական օրենսգրքի 155-րդ հոդվածի 2-րդ մասի 7-րդ և 8-րդ կետերի /երեք դրվագ/) նախատեսված ենթադրյալ հանցագործության կատարում: Նշված վարույթի շրջանակներում կատարված նախաքննության ընթացքում բավարար փաստական տվյալներն են ձեռք բերվել այն մասին, որ վարույթային ծախսերը կազմում է 2.668.000 ՀՀ դրամ, ուստի հիմնավոր է քննիչի միջնորդությունը՝ վարույթային ծախսերի հատուցումն ապահովելու համար Անդրանիկ Նվերի Ավագյանին (ծնված 27.02.1990թ. ՀԾՀ *****) սեփականության իրավունքով պարկանոց **** քաղաքի **** փողոցի N **** հասցեում (N ****-**-**** վկայական) գտնվող

² Տե՛ս վարույթի նյութեր, հատոր 2, թերթեր 45-53:

անշարժ գույքը (*.*.*.*.*.*. հա հողամասի և *.*.*.*. քմ ընդհանուր մակերեսով շենք-շինության) է 2.668.000 ՀՀ դրամի չափով արգելադրելու մասին:

Ինչ վերաբերում է մեղադրյալ Անդրանիկ Նվերի Ավագյանի պաշտպան Ռուբեն Հակոբյանի կողմից բերված հայտով վերանայման բողոքում նշված փաստարկներին (պնդումներին), ապա հարկ է նկատել, որ դրանք Առաջին ասրյանի դատարանի կողմից բազմակողմանի վերլուծության են ենթարկվել, որպիսի մոտեցումները նույնպես ընդունելի են Վերաքննիչ դատարանի համար, ուստի Վերաքննիչ դատարանը դրանց վերստին չի անդրադառնում կրկնությունից անհարկի խուսափելու համար:

Այսպիսով՝ Վերաքննիչ դատարանը հաշվի առնելով վերոգրյալ եզրահանգումները, գտնում է, որ մեղադրյալ Անդրանիկ Նվերի Ավագյանի պաշտպան Ռուբեն Հակոբյանի կողմից բերված հայտով վերանայման բողոքը պետք է մերժել՝ Առաջին ասրյանի դատարանի 2023 թվականի հունիսի 29-ի որոշումը թողնելով անփոփոխ (...)³:

Վճռաբեկ դատարանի հիմնավորումները և եզրահանգումը

10. Սույն գործով Վճռաբեկ դատարանի առջև բարձրացված իրավական հարցը հետևյալն է. հիմնավորվա՞ծ են արդյոք մեղադրյալ Ա.Ավագյանին սեփականության իրավունքով պատկանող անշարժ գույքն արգելադրելու վերաբերյալ նախաքննության մարմնի որոշման իրավաչափությունը հաստատելու մասին ստորադաս դատարանների հետևությունները:

11. «Մարդու իրավունքների և հիմնարար ազատությունների պաշտպանության մասին» եվրոպական կոնվենցիայի 1-ին արձանագրության (այսուհետ՝ Արձանագրություն) 1-ին հոդվածի համաձայն՝ «Յուրաքանչյուր ֆիզիկական կամ իրավաբանական անձ ունի իր գույքից անարգել օգտվելու իրավունք: Ոչ ոքի չի կարելի զրկել նրա գույքից, բացառությամբ ի շահ հանրության և այն պայմաններով, որոնք նախատեսված են օրենքով ու միջազգային իրավունքի ընդհանուր սկզբունքներով:

³ Տե՛ս վարույթի նյութեր, հատոր 2, թերթեր 101-121:

Նախորդ դրույթները, այնուամենայնիվ, չեն խոչընդոտում պետության այնպիսի օրենքներ կիրառելու իրավունքին, որոնք նա անհրաժեշտ է համարում ընդհանուր շահերին համապատասխան, սեփականության օգտագործման նկատմամբ վերահսկողություն իրականացնելու կամ հարկերի կամ մյուս գանձումների կամ տուգանքների վճարումն ապահովելու համար»:

ՀՀ Սահմանադրության 10-րդ հոդվածի 1-ին մասի համաձայն՝ «Հայաստանի Հանրապետությունում ճանաչվում և հավասարապես պաշտպանվում են սեփականության բոլոր ձևերը»:

ՀՀ Սահմանադրության 60-րդ հոդվածի համաձայն՝ «1. Յուրաքանչյուր ոք ունի օրինական հիմքով ձեռք բերած սեփականությունն իր հայեցողությամբ տիրապետելու, օգտագործելու և տնօրինելու իրավունք:

(...)

3. Սեփականության իրավունքը կարող է սահմանափակվել միայն օրենքով՝ հանրության շահերի կամ այլոց հիմնական իրավունքների և ազատությունների պաշտպանության նպատակով:

4. Ոչ ոք չի կարող զրկվել սեփականությունից՝ բացառությամբ դատական կարգով՝ օրենքով սահմանված դեպքերի (...):»:

ՀՀ քրեական դատավարության օրենսգրքի 26-րդ հոդվածի 7-րդ մասի համաձայն՝ «Վարույթի ընթացքում անձի գույքի արգելադրումը ենթակա է պարտադիր դատական ստուգման»:

ՀՀ քրեական դատավարության օրենսգրքի 131-րդ հոդվածի համաձայն՝ «1. Գույքի արգելադրումը կիրառվում է ենթադրյալ հանցագործությամբ պարճառված հնարավոր վնասի կամ վարությանին հնարավոր ծախսերի հատուցումը, ինչպես նաև գույքի հնարավոր բռնագրավումը կամ բռնագանձումն ապահովելու համար:

2. Գույքը կարող է արգելադրվել հետևյալ հիմքերից որևէ մեկի առկայության դեպքում՝

(...)

5) առկա է ողջամիտ ենթադրություն այն մասին, որ այդ գույքը կարող է օտարվել, թաքցվել, վնասվել, ոչնչացվել կամ ապստվել»:

ՀՀ քրեական դատավարության օրենսգրքի 133-րդ հոդվածի համաձայն՝
«1. Նախաքննության ընթացքում գույքն արգելադրվում է քննիչի որոշման հիման վրա: Այդ որոշումը և այն հիմնավորող նյութերը եռօրյա ժամկետում ներկայացվում են իրավասու դատարանի հաստատմանը: (...)

(...)

7. Արգելադրման ենթակա գույքի արժեքը որոշվում է շուկայական գնով այդ նպատակով ներգրավված փորձագետի կողմից:

8. Եթե որոշման մեջ արգելադրման ենթակա գույքը որոշակիացված չէ, ապա արգելադրմանը ներկա գտնվող սեփականատերերը կամ գույքի տիրապետողն իրավունք ունի ընտրելու այն գույքը, որը բավարար է որոշման պահանջները կատարելու համար (...):»:

ՀՀ քրեական դատավարության օրենսգրքի 134-րդ հոդվածի 1-ին մասի համաձայն՝ «Բացի անշարժ գույքից և մեծածավալ ստարկաներից, արգելադրված այլ գույքն առգրավվում է»:

ՀՀ քրեական դատավարության օրենսգրքի 294-րդ հոդվածի համաձայն՝
«1. Սույն օրենսգրքով սահմանված պարզաճ իրավական ընթացակարգի շրջանակներում դատարանը քննում է՝

1) գույքի արգելադրման մասին քննիչի որոշման իրավաչափությունը հաստատելու վերաբերյալ միջնորդությունը

2) գույքի արգելադրումը վերացնելու վերաբերյալ միջնորդությունը»:

ՀՀ քրեական դատավարության օրենսգրքի 295-րդ հոդվածի համաձայն՝
«1. Սեփականության իրավունքի սահմանափակման իրավաչափության սրուգման վարույթը հարուցվում է գույքի արգելադրման մասին որոշման իրավաչափությունը հաստատելու՝ քննիչի միջնորդության հիման վրա, որը դատարան է ներկայացվում համապատասխան գույքն արգելադրելուց հետո՝ եռօրյա ժամկետում:

(...)

3. Միջնորդությանը կցվում են քրեական վարույթ նախաձեռնելու մասին արձանագրության, համապատասխան անձի նկարմամբ քրեական հետապնդում հարուցելու մասին որոշման, գույքի արգելադրման մասին որոշման պարզաչափությունը, գույքի սեփականատիրոջը կամ դրա նկարմամբ գույքային շահ ունեցող այլ անձի

յովյալ միջնորդության պատճենն ուղարկած լինելը հաստատող փաստաթուղթ, ինչպես նաև գույքի արգելադրման մասին որոշման հիմնավորվածությունը հաստատող անհրաժեշտ նյութերի պատճենները:

(...)

5. Վարույթ հարուցելու մասին որոշման մեջ նշվում է այն գրավոր, իսկ սույն օրենսգրքի 264-րդ հոդվածի 5-րդ մասով նախատեսված դեպքում՝ բանավոր ընթացակարգով իրականացնելու մասին: Բանավոր ընթացակարգով վարույթ իրականացնելու դեպքում որոշման մեջ նշվում են դատական նիստի անցկացման վայրը, տարին, ամիսը, օրը, ժամը, ինչպես նաև դոնաց կամ դոնիակ լինելը: Որոշման պատճենը պարզաձև ձևով ուղարկվում է միջնորդությունը հարուցած քննիչին, ինչպես նաև արգելադրված գույքի սեփականատիրոջը կամ դրա նկատմամբ գույքային շահ ունեցող այլ անձի (...):»:

ՀՀ քրեական դատավարության օրենսգրքի 296-րդ հոդվածի համաձայն՝ «1. Սեփականության իրավունքի սահմանափակման իրավաչափության սրուգման վարույթն իրականացվում է գրավոր, իսկ սույն օրենսգրքի 264-րդ հոդվածի 5-րդ մասով նախատեսված դեպքում՝ բանավոր ընթացակարգով: Բանավոր ընթացակարգով միջնորդության քննությունն իրականացվում է դատախոսների ձևով՝ քննիչի պարտադիր մասնակցությամբ: Դատախոսներին մասնակցելու իրավունք ունեն արգելադրված գույքի սեփականատերերը, կամ դրա նկատմամբ գույքային շահ ունեցող այլ անձը, նրանց ներկայացուցիչը, ինչպես նաև հսկող դատախազը (...):»:

12. 1998 թվականի հուլիսի 1-ին ընդունված ՀՀ քրեական դատավարության օրենսգրքի համապատասխան նորմերը մեկնաբանելիս, Վճռաբեկ դատարանն արձանագրել է, որ գույքի տիրապետման, տնօրինման և օգտագործման՝ սեփականատիրոջ իրավագործությունները մեծ կարևորության իրավական արժեքներ են, որոնք ունեն սահմանադրական բնույթ: Դրանց սահմանափակման համար անհրաժեշտ է, որ հակակշիռ իրավական շահն ունենա բացառիկ նշանակություն⁴:

⁴ Տե՛ս *mutatis mutandis*, Վճռաբեկ դատարանի՝ Արթուր Հայրապետյանի գործով 2010 թվականի օգոստոսի 27-ի թիվ ԵՇԴ/0001/11/10 որոշումը, կետ 19:

Զարգացնելով նախկինում արտահայտած իրավական դիրքորոշումները՝ Վճռաբեկ դատարանը հարկ է համարում նշել, որ անձի կոնվենցիոն և սահմանադրական մակարդակով ամրագրված սեփականության իրավունքի լավագույնս պաշտպանությանն է ուղղված նոր քրեադատավարական այն կարգավորումը, ըստ որի՝ գույքի արգելադրման վերաբերյալ նախաքննության մարմնի որոշումն անպայմանորեն ենթակա է դատական վերահսկողության: Վերջինս ընդգծում է անձի սեփականության իրավունքի կարևորությունը և հանդիսանում է լրացուցիչ երաշխիք կամայականությունների և իրավունքին անհարկի միջամտությունների դեմ:

Նման պայմաններում՝ գույքի արգելադրման անհրաժեշտության, անձի իրավունքին միջամտության համաչափ լինելու, հանրային և մասնավոր շահերի հավասարակշռման վերաբերյալ նախաքննության մարմնի փաստարկներին առաջադրվում է հիմնավորվածության ավելի բարձր շեմ՝ միևնույն ժամանակ ընդլայնելով պաշտպանության կողմի հնարավորությունը՝ անձի իրավունքի սահմանափակման վերաբերյալ հայտնելու իր դիրքորոշումը՝ անկախ և անաչառ դատարանի ներկայությամբ:

Վերոգրյալից հետևում է, որ գույքի արգելադրման վերաբերյալ նոր քրեադատավարական նորմերի շրջանակում օրենսդիրն առավելագույնս ապահովել է հանրային և մասնավոր շահերի միջև հավասարակշռության պահպանման պահանջը:

12.1. Վճռաբեկ դատարանը հարկ է համարում նշել, որ գույքի արգելադրումը՝ անկախ հետապնդվող նպատակից և օրենսդրական հիմքից, մշտապես իրենից ներկայացնում է միջամտություն անձի սեփականության իրավունքին: Եվ դատարանի խնդիրն է յուրաքանչյուր գործով պարզել, թե որքանով է անձի իրավունքին միջամտությունը հիմնավորված, և առկա է արդյոք համաչափություն հետապնդվող իրավաչափ նպատակի և վերջինիս հասնելու համար գործադրված միջոցների միջև:

Մարդու իրավունքների եվրոպական դատարանը (այսուհետ՝ Եվրոպական դատարան) *Բորժոնովն ընդդեմ Ռուսաստանի* գործով նշել է, որ պետք է լինի ողջամիտ հավասարակշռություն պետության կողմից կիրառվող, այդ թվում՝

սեփականության իրավունքով իրեն պատկանող գույքը վերահսկելու հետ կապված միջոցների և այդ միջոցների կիրառման արդյունքում ակնկալվող նպատակների միջև: Այս պահանջն արտահայտվում է «արդարացի հավասարակշռություն» ձևակերպմամբ, որը պետք է առկա լինի հասարակության ընդհանուր շահի պահանջների և անհատի հիմնարար իրավունքների պաշտպանության միջև:

Եվրոպական դատարանն ընդգծել է, որ մեղադրյալի գույքի վրա կալանք դնելն ինքնին ենթակա չէ քննադատության՝ հաշվի առնելով, մասնավորապես, «Մարդու իրավունքների և հիմնարար ազատությունների պաշտպանության մասին» եվրոպական կոնվենցիայի թիվ 1 Արձանագրության 1-ին հոդվածի երկրորդ պարբերությունը, սակայն պետք է հաշվի առնել սեփականության իրավունքով իրեն պատկանող գույքից օգտվելու սահմանափակմամբ անձի վրա չափազանց ծանր բեռ դնելու ռիսկը և, հետևաբար, պետք է ապահովել համապատասխան դատավարական երաշխիքներ՝ համոզվելու համար, որ անձի սեփականության իրավունքի վրա առկա ազդեցությունը կամայական և ոչ կանխատեսելի չէ⁵:

Նմանատիպ դիրքորոշում է հայտնել նաև Վճռաբեկ դատարանը, նշելով, որ անձի սեփականության իրավունքի համաչափ սահմանափակման տեսանկյունից կարևոր օրենսդրական պահանջ է նաև գույքի վրա կալանք դնելու մասին որոշման մեջ արգելադրման ենթակա գույքի և դրա արժեքի հստակեցումը, ինչն իր հերթին պետք է հիմնավորված լինի այդ հարկադրանքի միջոցի կիրառմամբ հետապնդվող նպատակներով, լինի որոշակի և հստակ՝ ապահովելով հասարակության ընդհանուր շահի և անհատի սեփականության (կամ այլ գույքային) իրավունքի պաշտպանության միջև արդարացի հավասարակշռությունը⁶:

Գույքի արգելադրման օրենսդրական նպատակներից մեկը վարությային հնարավոր ծախսերի հատուցման ապահովումն է, որի վերաբերյալ Վճռաբեկ դատարանն արտահայտել է իրավական դիրքորոշում առ այն, որ նշված նպատակով արգելադրման ենթակա գույքի արժեքը որոշելիս նույնպես վարույթն իրականացնող մարմինը պետք է հիմնվի գործում առկա նյութերի վրա (օրինակ՝ փորձագիտական

⁵ Տե՛ս, *mutatis mutandis*, Մարդու իրավունքների եվրոպական դատարանի՝ *Borzhanov v. Russia* գործով 2009 թվականի հունվարի 22-ի զանգատ թիվ 18274/04, կետեր 59-60:

⁶ Տե՛ս *mutatis mutandis*, Վճռաբեկ դատարանի՝ *Սաւմէլ Մայրապետյանի* գործով 2019 թվականի դեկտեմբերի 20-ի թիվ ԵԴ/0587/11/18 որոշումը, կետ 15.2:

համապատասխան հիմնարկի տրամադրված տեղեկատվությունը՝ գույքի մոտավոր արժեքի վերաբերյալ): Միննույն ժամանակ, Վճռաբեկ դատարանը, հաշվի առնելով դատական ծախսերի հստակ որոշման անհնարինությունը, հատկապես քրեական դատավարության սկզբնական փուլերում, նշել է, որ վարույթն իրականացնող մարմինը վերոնշյալ նպատակով կալանքի ենթակա գույքի արժեքը որոշելիս օժտված է որոշակի հայեցողությամբ, որը, սակայն, պետք է լինի ողջամիտ և չհանգեցնի անձի՝ գույքն անարգել տնօրինելու, տիրապետելու կամ օգտագործելու իրավունքի անհամաչափ սահմանափակումների: Հակառակ մեկնաբանման պարագայում, կստացվի ոչ իրավաչափ այնպիսի իրավիճակ, երբ միայն դատական ծախսերի ապահովման նպատակով կարող է կալանք դրվել անձի ամբողջ գույքի վրա, որի արժեքը կարող է մի քանի անգամ գերազանցել հնարավոր դատական ծախսերի գումարը, զուտ այն պատճառով, որ չի հստակեցվել դատական ծախսերի չափը⁷:

Թե՛ միջազգային, թե՛ ներպետական նախադեպային իրավունքի ուսումնասիրությունը ցույց է տալիս, որ ցանկացած պարագայում անթույլատրելի է անձի սեփականության իրավունքի այնպիսի սահմանափակումը, որի արդյունքում վերջինիս վրա կդրվի անհամեմատ ավելի ծանր բեռ, քան իրականում անհրաժեշտ է օրենսդրությամբ նախատեսված նպատակների իրագործման համար, կամ, որի դեպքում անձի սեփականության իրավունքն անհարկի այնպիսի ծավալով կսահմանափակվի, որ արդյունքում կխաթարվի այդ իրավունքի բուն էությունը և անձի համար ունեցած նշանակությունը:

Մասնավորապես, վարույթային հնարավոր ծախսերի ապահովման նպատակով գույքի արգելադրման դեպքում՝ այդ ծախսերի և արգելադրվող գույքի արժեքի միջև պետք է հնարավորինս ապահովվի ողջամիտ հավասարակշռություն: Գույքի արգելադրում կիրառողը՝ կլինի նախաքննության մարմինը, թե դատարանը, պետք է ձգտի ապահովել անձի սեփականության իրավունքին հնարավորինս նվազ կերպով միջամտության իրականացումը:

13. Սույն գործի նյութերի ուսումնասիրությունից երևում է, որ՝

⁷ Տես *mutatis mutandis*, Վճռաբեկ դատարանի՝ Մամվել Մայրապետյանի գործով 2019 թվականի դեկտեմբերի 20-ի թիվ ԵԴ/0587/11/18 որոշումը, կետ 17.1:

- Առաջին ատյանի դատարանը փաստել է, որ վարույթի շրջանակներում կատարված նախաքննության ընթացքում բավարար փաստական տվյալներ են ձեռք բերվել այն մասին, որ վարութային ծախսերը կազմում են 2.668.000 ՀՀ դրամ, որպիսի պայմաններում վարութային ծախսերի հատուցումն ապահովելու համար Ա.Ավագյանին սեփականության իրավունքով պատկանող ***** քաղաքի ***** փողոցի № **** հասցեում գտնվող անշարժ գույքն արգելադրելու մասին քննիչի միջնորդությունը հիմնավոր է, ինչպես նաև հիմնավոր է քննիչի ենթադրությունն առ այն, որ մեղադրյալի կողմից իրեն պատկանող գույքը կարող է օտարվել:

Առաջին ատյանի դատարանը, անդրադառնալով պաշտպանի այն դիտարկմանը, որ իրեն ի սկզբանե չի տրամադրվել միջնորդության օրինակը, արձանագրել է, որ դա ըստ էության սույն փուլում կրում է ձևական բնույթ՝ հաշվի առնելով, որ մինչև միջնորդության բանավոր ընթացակարգով քննարկումը քննիչի կողմից պաշտպանին տրամադրվել է միջնորդության օրինակը, ապահովվել է պաշտպանի իրավունքը ներկայացնելու համապատասխան առարկություններ, հետևաբար պաշտպանական կողմի որևէ իրավունք այդ առումով չի խախտվել:

Բացի այդ, Առաջին ատյանի դատարանը նշել է, որ Ա.Ավագյանին սեփականության իրավունքով պատկանող անշարժ գույքի շուկայական արժեքին մոտարկված կադաստրային արժեքը, կազմում է 28.345.859 ՀՀ դրամ:

Այս առումով, Առաջին ատյանի դատարանը գտել է, որ նշված անշարժ գույքի շուկայական արժեքն ակնհայտորեն չի կարող գերազանցել վարութային ծախսերի չափը, ուստի նման իրադրությունում քրեադատավարական այդ դրույթի չապահովումը չի կարող հանգեցնել քննիչի որոշման ոչ իրավաչափության: Արդյունքում՝ Առաջին ատյանի դատարանն արձանագրել է, որ սույն վարույթի շրջանակներում քննիչի՝ գույքի արգելադրման որոշման իրավաչափությունը հաստատելու մասին միջնորդությունը հիմնավոր է, ուստի այն պետք է բավարարել⁸:

- Վերաքննիչ դատարանն անփոփոխ է թողել Առաջին ատյանի դատարանի՝ 2023 թվականի հունիսի 29-ի որոշումը՝ բերելով նույնաբովանդակ հիմնավորումներ⁹:

⁸ Տես սույն որոշման 8-րդ կետը:

⁹ Տես սույն որոշման 9-րդ կետը:

14. Նախորդ կետում մեջբերված փաստական հանգամանքները գնահատելով սույն որոշման 11-12.1-րդ կետերում վկայակոչված իրավադրույթների և շարադրված իրավական դիրքորոշումների լույսի ներքո՝ Վճռաբեկ դատարանն արձանագրում է, որ ստորադաս դատարանների կողմից նախաքննության մարմնի միջնորդության բավարարումը և գույքն արգելադրելու մասին որոշման իրավաչափության հաստատումը հանգեցրել են մեղադրյալ Ա.Ավագյանի սեփականության իրավունքի անհամաչափ սահմանափակման:

Վճռաբեկ դատարանն արձանագրում է, որ վարության ծախսերի և դրանց ապահովման նպատակով արգելադրված գույքի արժեքների միջև ակնհայտորեն առկա չէ հավասարակշռություն, նկատի ունենալով, որ արգելադրված գույքի միայն կադաստրային արժեքը գրեթե 11 անգամ գերազանցում է վարության ծախսերը, ինչի արդյունքում մեղադրյալ Ա.Ավագյանի սեփականության իրավունքը ենթարկվել է անհամաչափ միջամտության:

Հաշվի առնելով այն հանգամանքը, որ ըստ վարության նյութերում առկա տվյալների՝ Ա.Ավագյանին սեփականության իրավունքով պատկանել է նաև այլ՝ շարժական գույք¹⁰, վարության իրականացնող մարմինը չի ապահովել անձի իրավունքին առավել նվազ (մեղմ) միջոցի կիրառմամբ միջամտության սկզբունքը՝ անհարկի ծանր բեռ դնելով մեղադրյալի վրա:

Նման պայմաններում, Վճռաբեկ դատարանի գնահատմամբ, Ա.Ավագյանին սեփականության իրավունքով պատկանող այլ՝ առավել համարժեք գույքի արգելադրումը, լիովին կբխեր համաչափության սահմանադրական սկզբունքից՝ հաշվի առնելով նաև առհասարակ բնակելի տան կամ բնակության նպատակով օգտագործվող որևէ այլ տարածքի ունեցած սոցիալական, տնտեսական նշանակությունն ու կարևորությունն անձի համար:

15. Անդրադառնալով միջնորդությունը պաշտպանության կողմին ուղարկված չլինելու վերաբերյալ բողոքաբերի պնդումներին՝ Վճռաբեկ դատարանն արձանագրում է հետևյալը. վարության նյութերից երևում է, որ Առաջին ատյանի դատարանը միջնորդության քննության գրավոր ընթացակարգը փոխակերպել է բանավորի, մինչև միջնորդության քննությունն այն վարության իրականացնող մարմնի

¹⁰ Տե՛ս վարության նյութեր, հատոր 1, թերթ 201:

կողմից էլեկտրոնային փոստի միջոցով դատական նիստից 6 օր առաջ ուղարկվել է պաշտպանական կողմին, որն էլ միջնորդության քննության ընթացքում ներկայացրել է դրա վերաբերյալ իր դիրքորոշումները: Արդյունքում պաշտպանության կողմը փաստացի ունեցել է հնարավորություն՝ նախապես ծանոթանալու ներկայացված միջնորդությանը և հայտնելու դրա վերաբերյալ իր դիրքորոշումը:

Միննույն ժամանակ, նախաքննության մարմնի կողմից պաշտպանության կողմին միջնորդությանը կից դատարան ներկայացված նյութերի միայն ցանկն ուղարկելու առնչությամբ Վճռաբեկ դատարանը հարկ է համարում վկայակոչել ՀՀ քրեական դատավարության օրենսգրքի 296-րդ հոդվածի 5-րդ մասը, համաձայն որի՝ *«Կողմերը կարող են դատարան ներկայացնել վարույթի առարկային վերաբերող լրացուցիչ նյութեր: Վերաբերելի չլինելու դեպքում դատարանը քննության չի առնում լրացուցիչ նյութերը, սակայն պարտավոր է դրանք կցել վարույթին: Վերաբերելի լինելու դեպքում հակառակ կողմին տրվում է լրացուցիչ նյութերին ծանոթանալու ողջամիտ հնարավորություն»:*

Թեև սույն նորմի մեկնաբանությունից պարզ է դառնում, որ այն վերաբերում է դատարան ներկայացված լրացուցիչ նյութերին հակառակ կողմին ծանոթանալու հնարավորություն տալու իմպերատիվ պահանջին, այնուամենայնիվ, Վճռաբեկ դատարանն արձանագրում է, որ նման մոտեցումը հավասարապես վերաբերելի է նաև ի սկզբանե միջնորդությանը կից դատարան ներկայացված հիմնական նյութերին:

Հետևաբար նախաքննության մարմնի կողմից պաշտպանության կողմին միջնորդությանը կից դատարան ներկայացված նյութերի միայն ցանկն ուղարկելու արդյունքում վերջինս հայտնվել է անբարենպաստ իրավիճակում՝ զրկված լինելով իր իրավունքներն արդյունավետ կերպով իրացնելու հնարավորությունից:

16. Այսպիսով, Վճռաբեկ դատարանը գտնում է, որ ստորադաս դատարանների կողմից վարույթային ծախսերի ապահովման նպատակով մեղադրյալ Ա.Ավագյանին սեփականության իրավունքով պատկանող անշարժ գույքն արգելադրելու վերաբերյալ նախաքննության մարմնի որոշման իրավաչափության հաստատումը հիմնավորված չէ:

17. Անփոփելով վերոգրյալը՝ Վճռաբեկ դատարանը գտնում է, որ սույն գործով ստորադաս դատարանները թույլ են տվել դատական սխալ՝ ՀՀ քրեական դատավարության օրենսգրքի 15-րդ հոդվածով սահմանված սկզբունքի խախտում, ինչը նույն օրենսգրքի 362-րդ հոդվածի համաձայն, հիմք է ստորադաս դատարանի դատական ակտը բեկանելու համար:

Ելնելով վերոգրյալից և ղեկավարվելով Հայաստանի Հանրապետության Սահմանադրության 162-րդ, 163-րդ, 171-րդ հոդվածներով և Հայաստանի Հանրապետության քրեական դատավարության օրենսգրքի 31-րդ, 33-րդ, 34-րդ, 264-րդ, 281-րդ, 352-րդ, 359-րդ, 361-363-րդ և 400-րդ հոդվածներով՝ Վճռաբեկ դատարանը

Ո Ր Ո Շ Ե Ց

Երևան քաղաքի առաջին ատյանի ընդհանուր իրավասության քրեական դատարանի՝ 2023 թվականի հունիսի 29-ի որոշումը և այն անփոփոխ թողնելու մասին ՀՀ վերաքննիչ քրեական դատարանի՝ 2023 թվականի հուլիսի 24-ի որոշումը բեկանել:

Նախաքննության մարմնի 2023 թվականի հունիսի 16-ի՝ գույքն արգելադրելու մասին որոշման իրավաչափությունը հաստատելու վերաբերյալ միջնորդությունը մերժել:

Նախաքննության մարմնի 2023 թվականի հունիսի 15-ի՝ գույքն արգելադրելու մասին որոշումը վերացնել:

Որոշումն օրինական ուժի մեջ է մտնում կայացնելու օրը:

Նախագահող՝ _____ Հ.ԱՍԱՏՐՅԱՆ

Դատավորներ՝ _____ Ս.ԱՎԵՏԻՍՅԱՆ

_____ Հ.ԳՐԻԳՈՐՅԱՆ

_____ Ա.ԴԱՆԻԵԼՅԱՆ

_____ Լ.ԹԱԴԵՎՈՍՅԱՆ

_____ Ա.ՊՈՂՈՍՅԱՆ